



Sujet 2012:

Öisi eigeni Bank zum 30 Joor - Jubiläum

Mir trotz der Euro- und Finanzkrise mit öisere eigene Bank

Vor 30 Joor isch d Bankewält no in Ornig gsi. Vernümpftigi Spaarzinse und keini überrissene Boni hai damals regiert. Bisch no an Schalter gange und hesch fascht jede vo de ne Beamte kennt, drum bisch mängisch au öfters wiider anegrennt.

Hüt isch alles anderscht und nit öppe besser, nei im Gege- teil du hocksch numme no vorem „PC“ und machsch „E- Banking“, öppis vill gscheiters chunnt dir nümme in Sinn. S isch alles anonüm worde, de kennsch keini Schalterbe- amte me und Zuesatzgebüüre gits all wie mee.

Jetz hai mir no der EURO im Tief und mit de Staatsfinanze stoots Europawyt schief. Rettigsschirm wärde besproche und vill wei no irgend wie inere Schwyzerbank wäge de Stüüre iiri Erspaarnis go verloche. Dasch zwar momentan au nit so schlaue, ufsmool bisch regischtriiert, ufe CD brennt, und ganz schnäll vo dyne Batzeli trennt.

Das ganze Gschyys isch öis verleidet, drum hai mir öis als Trotzchöpf verchleidet. Mir hai jetz gnueg vo däm ganze Gezank und gründe öisi eigeni Bank. E Bank mit ver- nümpftige Bänker wo au uf iiri „Boni“ verzichte und mit öis Chunde wiider deuje brichte.

Mir hai au Chundeberooter und die hai sich scho echly schlaue gmacht und hai sich informiiert was by öis in der Stadtverwaltig nit funktioniiert, oder allefalls chönnti ver- besseret wärde. Zweek oder drei Vorschläg chönnte mir ooni Honorar do scho mache.

Under anderem isch halt Lieschtel scho echly e Hochprys- Insle, mir si einsami Spitze mit öisem Stüüfuess, das isch doch e Fass ooni Bode, do si mir kantonswy z Oberscht obe. Das sett sich scho bald emol bessere oder zum Gue- te wände, wens nit mitere Volksabwanderig sell ände!

Mir hätte do scho Tips oder Ideeä, wo öise Stadt- oder Yywoonerroot chönnti d Hebel aasetze, um Lieschtel au finanziell wiider interessanter chönne z mache. Blaonet und bouet in de nööchschte Joor e chly weniger und leujet d Lüt wiider emol lo woone und s Stedtli gniesse, in der Zyt chönnte wiider d Batzeli spriesse.

No eine zu öisne Noochberländer. D Frau Angela Merkel und der Mösiö Nicolas Sarkozy wei jo wirklich d Retter vom EURO sy. Öis nimmts numme Wunder was die würde säge, wenn me die neue EURO mit iirem Abbild lot lo brä- ge und denn Merkozy-EURO würdi säge.

Mir Trotzchöpf-Bänker und Geburtsdaagschinder gniesse jetz die tolle Dääg und leuje öisi Rubel lo rolle, ooni öisi Chunde z vergrolle. Mir wünsche allne e gueti Zyt und dä- nket draa, die nööchschi Bank isch nit so wyt. Wenn dir müesset Noochschub tanke, gönget zu einer vo de ver- nümpftige Banke. Schööni Fasnecht 2012

Wie allewyy! isch am Fasnechtszyschdig d Ladäärne- Uusstellig in der Roothuusstrooss vom zwöi Zmidaag bis am nüüni Zoobe!